

Las zonas da tempo 30 ed ils autos intelligents

Pil mument ein numerusas damondas d'introducir tempo 30 pendentas

DAD AUGUSTIN BEELI / ANR

■ «La polizia cantunala – tia amitga e gidontra»: Aschia tuna ei adina. Sch'ins giavischa denton agid e sustegn en connex cun quietar il traffic en vitgs e quaters renda ella attent als paragrafs. In fatg ei che la polizia cantunala grischuna sto s'occupar actualmeins da varga 30 damondas per tempo 30. A Sagogn ei la situaziun aunc buca clara. Il matg d'uonn haveva in comite sfurzau la suprastanza communal da s'occupar culla tematica da tempo 30 tras il vitg. La radunanza communal ha acceptau l'iniziativa, dapi lu spetga la populaziun ch'ella vegni introducida. La polizia cantunala haveva rendiu attent ordavon ch'ei drovi aunc ulteriuras examinaziuns e mesiraziuns. Malgrad ch'ina maiortad dil pievel giavischa ei, vegn la zona da tempo 30 buca realisada schi spert. Il cass da Sumvitg ch'ei staus avon dertgira federala ha statuu in exempel el Grischun. Avon ch'ins sa decider novas zonas per quietar il traffic drova ei expertisas specialas. Igl obstachel ei vegnius pli aults per la vischnaunca – malgrad ch'ina pluralitad giavischass immediat tempo 30 en loghens stretgs e malsegirs. Cun lur iniziativa vulan ils iniziants da Sagogn contonscher dapli segirtad buca mo en contuorn dalla scola, mobein sin tuttas vias dil vitg. La procedura per la limitaziun sin tempo 30 ei denton colligiada cun ina nova e cara expertisa – che la vischnaunca sto pagar.

Automobilists stressai encunter ils planoris

Tenor l'Associaziun traffic ed ambient (VCS) augmenta ina reducziun da tem-



En tals loghens stretgs reducescha igl automobilist automaticamein il tempo – era senza zona 30.

FOTO A. BEELI

po essenzialmeins la canera ed il consum d'energia. Zonas da tempo 30 augmenten era la segirtad e la qualitat da viver, e quei cun dameins cuosts. La locuziun «Il temps ei daners» vala forsia sch'ins dumbra las secundas ch'ins drova per carar tras ina zona da tempo 30. Manischunzs da professiun sevilentan sch'els ein confruntai dapertut cun obstachels. Era autos da vitgira, camiunettas, mistergners e gliעד da fatschenta ston se-

capeschia reducir il tempo. Quei seigi ina cassa dalla disa, manegian ils manischunzs «plauns». Sch'ins setegni vid ina limita e patratgi vid ils pedunzs els vitgs e quaters mondien ins automaticamein pli precaut ed attent, manegian auters «planoris». Igl ei tals che selaian buca stressar d'automobilists che van a dies agl auto davon els.

Damondas officialas per tempo 30 ein pendentas ellas suandontas vischnauncas

sursilvanas: Breil, Sursaissa Mundaun, Ruschein, Sagogn, Schluein, Trun e Versomi. A Laax, Valendau e Flem ei la polizia aunc vidlunder da sclarir il basegns per ina tala mesira. Egl entir Grischun eis ei aunc 20 ulteriuras damondas pendentas. Seigi sco ei vegli: Tiel traffic stradal constatesch'ins ina interessanta constellaziun che ha forsia ina certa influenza sila decisiun d'introducir tempo 30: D'ina vart vegnan ils autos adina pli sperts ed

autonoms. Dall'atra giavischa la populaziun – denter quella era persunas che carreschan sezzas senza risguard tras il vitg – ch'ins prendi mesiras per quietar il traffic.

Nova generaziun d'autos

En connex cullas zonas da tempo 30 el Grischun ha deputau Beat Deplazes inoltrau a caschun dalla davosa sessiun dil cussegl grond ina damonda alla regenza. El e 26 consignaders damondan schebein la regenza seigi buca era dil meini ch'ins stoppi puspei saver simplificar la procedura per introducir tempo 30. Seigi sco ei vegli, el futur vegnan talas zonas da tempo 30 forsia a curdar da sesez, quei grazia als autos «intelligents». Autos parcan sezs, autos mesiran e tegnan la distanza ella colonna, autos freinan automaticamein. La nova generaziun dad autos ei equipada cun aschi bia electronica ch'il manischunz sto mo pli aunc saver programmar il computer. Igl auto s'envida e va bunamein da sesez cu il manischunz s'avischina.

Igl ei era buca pli mo ina visiun che la nova generaziun da vehichels sa leger tablas e signalisaziuns. Ei savess esser ch'il traffic sequietescha da sesez – grazia als autos electronics. Ils garaschists e vendiders d'auto fan gia oz reclama cun autos «intelligents» equipai cun sensors che legian tablas dil traffic. Per exempel adatescha in auto da persunas dalla generaziun nova automaticamein il tempo schi prest ch'el entra en in vitg ni in quater. Il sensor dil vehichel ha recepiu il signal dalla limita da tempo e signalisescha agl autist da reducir sin 50. Igl auto sa buca – aunc buca – reducir sez il tempo, el avertescha denton igl autist da far quei.

Proteger l'atgna integritad

Puntreis, il center da sanadad, ha tematisau la violenza

DAD ANDREAS CADONAU

■ Duront treis dis ein tut ils emploiats da Puntreis, center da sanadad SA a Mustér, sefatschentai cun la violenza en la rama dad in perfecziunament. Las participontas ed ils participonts ein buca senuspi da tematisar aspects che vegnan bugen tabuisai. El Center da sanadad Puntreis a Mustér vivan 55 cussadents e per il beinstar da quels habitonts procuran buca meins che 80 emploiadas ed emploiats che partan 60 plazzas da lavur. Leu nua che tontas persunas s'entapan e lavuran sut in tetg sesviluppeschian magari tensiuns humanas e conflicts. Enzatgei dil tuttafatg normal, sco quei che Mattias Grond ei s'exprimius avon il personal dil center da sanadad seradunans per ina scolaziun. Grond ei vegnius engaschus dil meinagestium da Puntreis, Diego Deplazes, sco um dil fatg per tgamunar il perfecziunament purschius dil center da sanadad a tut las emploiadas ed emploiats el decuors da treis dis. Violenza ei in plaid che vegn colligiada per regla cun pugnadas sanguinusas e cun grevs maltractaments corporals. Violenza sa denton esser in bionton pli subtila, sco quei che Grond ha dau d'entellir ed el ha menziunau las spetgas humanas che vegnen savens buca ademplidas e che caschunien cheutras emozions e sappien effectuar aggressiuns. Per exempel ha el numnau la violenza psichica che seigi grev definabla. Nauschadads verbalas appartegnan ton a quella violenza sco ignorar basegns ni buca porscher il sustegn necessari, sapientivamein sur ni sutdumandar ina persuna ni restrenscher il dretg dall'atgna decisiun. Situaziuns sco quei che Grond ha dau d'entellir che sappien succeder ton denter ils emploiats sez



Diego Deplazes (sen.) ha iniziav e Mattias Grond (dretg) tgamuna il perfecziunament davart la violenza per il personal dil Center da sanadad Puntreis a Mustér.

FOTO A. CADONAU

ni denter ils cussadents. Mo era denter cussadents ed emploiadas ed emploiats e viceversa. Grond ha intimau il personal da ponderar davart talas situaziuns el mintgagi da lavur e da s'exprimer leusura.

Promover ina buna cultura da casa

Tenor las explicaziuns da Grond existan negins manuals cun receipts generals da dar damogn als divers aspects dalla violenza. Per el ei l'aschinumnada cultura da casa e la cultura d'equipa d'impurtonza per tematisar la violenza e per scaffir in clima che lubeschi da s'exprimer e d'elavurar soluziuns. «Ni supprimer las emozions ni acceptar la violenza ei ina soluziun.» La violenza psichica ei sulet stada in aspect tematisau sper la violenza fisica

che cumpeglia fridas ni ina tgira sapientivamein groppa, structuradas dil mintgagi che restrenschen ina veta che sedrezza all'atgna veglia e violenza sexuala. La clamada dalla tgira ei ina tipica clamada da dunns ed ellas ein magari confruntadas cun explicaziuns verbalas ed acts che vulnereschian l'integritad sexuala personala, per regla davart da singuls cussadents. In perfecziunament sco quel purschius da Puntreis lubescha da tematisar e discutir sur da tals schabets che pertuccan tuttas casas da tgira e da vegls, sco quei che Grond ha explicau. En quei cass ha el ludau il Center da sanadad Puntreis che laschi ils muossvias elavurai digl Uffeci cantunala da sanadad buca sulet en truchet, mobein tematiseschi ils aspects dalla violenza a moda activa. Sulet aschia

seigi ei pusseivel dad anflar las soluziuns adattadas per dar damogn a situaziuns specificas.

Ina sfida organisatorica

Il meinagestium da Puntreis, Diego Deplazes, ha dau d'entellir ch'il center da sanadad organischeschi regularmeins perfecziunaments che seigien obligatorics per il personal e che vegnien per part era pretendi digl Uffeci cantunala da sanadad. La tematica violenza seigi vegnida tschardida sin giavisch neu dalla tgira, denton buca perquei che la violenza muntassi in problem specific per il center da sanadad. Il meinagestium ha visau alla sfida organisatorica per ina casa da vegls e da tgira dad organisar, a prau cul menaschi dil mintgagi, ina tala scolaziun. Il perfecziun-

ament el center da sanadad a Mustér ei perquei s'extendius sur treis dis, naven dil gliendisg vargau entochen la mesjamna. Per Deplazes ei la scolaziun buca mo d'impurtonza per il menaschi intern. Anovians vul el mussar ina casa da vegls e da tgira che sesprova da sesviluppar e porscher interessantas plazzas da lavur. Il sectur da sanadad enconuscha, tenor sias explicaziuns, ina aulta fluctuaziun da personal ed impurtonza ei la tscherza da personal. Buca sulet per quei motiv ei Puntreis center da sanadad SA ina dallas sulettas instituziuns da tgira e casa da vegls presenta sin facebook.

reclama



Andreas Felix
Grossrat/Partei-
präsident BDP
Haldenstein

«Staatliches Handeln muss berechenbar bleiben. Für die Strom-Versorgungssicherheit gilt das ganz speziell!»

27. November
Nein
Nein zu Kurzschluss-
handlungen
beim Atomausstieg
www.ausstiegsinitiative-nein.ch